



Makitsaarneq eqqissiveqannginnerlu

Makitsaarneq eqqissiveqannginnerlu

Makitsaarneq, eqqissiveqannginneq killeqanngitsumillu pissusilersorneq puigortunngortuni takussaagajupput. Pissusilersornikkut allannguutit, nappaatip ajorsiatornera peqatigalugu takkuttartut, puigortunngortut amerlanersaannik eqquisarput. Makitsaarneq, eqqissiveqannginneq killeqanngitsumillu pissusilersorneq iliuuseqarfigiuminaassinnaapput aamma qanigisanit sulisunillu ilungersunartutut misigineqartarlutik.

Makitsaarneq

Inuit puigortunngortut oqaatsitigut iliuusimikkullu makitsaarsinnaapput. Oqaatsitigut makitsaarnermi inuttaa suanngassisarpoq, pisuutitsisarluni allaallumi soorasaarisinnaasarluni. Iliuutsikkut makitsaarneq tassaasinnaavoq inummik arlaatigut ajatsineq, annersitsineq isimmitsinerlu.

Makitsaarneq puigortunngortup kamanneranik, ersineranik imaluunniit amigaatilittut susinnaanngitsutullu misigineranik pissuteqarsinnaavoq. Taama pissusilersonera iliuusissanik aqutsisinnaajunnaariartoreranik aamma pissuteqarsinnaavoq. Pingaartumik qaap tulluillu nalaanni qaratsap immikkoortuisigut puigortunngornermi, aalajangersimasumik iliuuseqarnissamik isumaqaleriasaernerup aqunniarnissaa ajutoorajuppoq puigortunngornerilli assigiinngitsut allat, nappaatip ajorsiatorluni immikkoortuini kingusinnerusuni qaap nalaani qaratsamat siaruaassimappat aamma allannguuteqartoqarsinnaavoq.

Makitsaarneq naatsorsuutigineqarsinnaasarpoq naatsorsuutiginningsamilli aamma takkussinnaasarluni. Makitsaarneq ilimagineqarsinnaasoq paaqqutarineqarnermut atatillugu pileraajuppoq, puigortunngortumut annertuallaanik piumasaqaateqarnermik, imaluunniit qanigisat sulisulluunniit naqqissuivallaarnerannik pissuteqarsinnaalluni.

Puigortunngortunik attaveqaqatigiinneq matumani pingaartorujussuuvoq, pingaartumik timimik atuineq, puigortunngortut timimik atuineramik annertuumik eqqumaffiginnittarmata.

Naatsorsuutiginningsamik makitsaarneq inunnut allanut, soorlu najugaqatinut nalaatsortumik tussinnaasarpoq, tamannalu piviusuuserisanik imaluunniit paatsuukkanik pissuteqarajulluni. Pissutaasinnaavoq aamma paaqqutarinnillutik sulisut, puigortunngortup pisariaqartitaanik paasisimasakippallaartut.

Qaap nalaani qaratsap immikkoortuani puigortunngortut makitsaarninngorajupput.

Eqqissiveqannginneq

Puigortunngortut toqqissiveqarajunngillat, iliuuseqarusulersarput siunnerfeqaratillu angalalersarlutik. Iliuuseqarusulernermi inuttaa qanigisanik sulisunilluunniit malersuiinnersarpoq, sumi tamaani peqataanialersarluni apeqqutinillu uteqattaarilersarluni. Iliuuseqarusunneq aamma tassaasinnaavoq inuttaata ilisanik allamut nuussueqattaalersarnera imaluunniit passusseqattaalersarnera. Puigortunngortut ilaat taamaaliormikkut, paatsiveqanngitsumi paasineqarsinnaanngitsumilu, isumaqarsinnaasumik imaluunniit naleqassutsimik pilersitseqqinniarsarisarput.





Makitsaarneq eqqissiveqannginnerlu

Killeqanngitsumik pissusilersorneq

Killeqanngitsumik pissusilersorneq narruumminartumik, mamianartumik, innarliinermik allatulluunniit inuit akornanni akuerineqarsinnaanngitsunik iliuuseqarnermik nassataqarajuppoq. Taakku tassaasinnaapput ingasattajaartumik nerineq imernerluunniit, pujortaannalernerneq imaluunniit kinguaassiuutitigut assuarnartumik pissusilersorneq. Qaap tulliuulla nalaanni qaratsap immikkoortuigut puigortunngortuni tunguarnitsutorusunnerulerneq atugaagajuppoq. Killeqanngitsumik pissusilersorneq nalinginnaasumik qaap nalaani qaratsap immikkoortuanut nappaatip puigortunngornerup siaruaassimaneranik pissuteqarpoq.

Pitsaaliuineq nakorsaanerlu

Nakorsaait eqqissisaait utaqqiisaagallartumik killilimillu sunniuteqarput navianaatilinnillu kingunerluuteqarsinnaallutik. Taamaakkaluortoq annertuumik eqqissiveqannginnermi sivikitsumik nakorsaatinik atuinisqaq pisariaqarsinnaavoq. Nakorsaqaq oqaloqatigiuk.

Makitsaarnermut imaluunniit eqqissiveqannginnermut pissutaasut qulaajaaviginisaa pingaaruteqarpoq. Taakku sunik pissuteqarnermut ilisimagaanni pitsaalineqarsinnaapput. Taakku inummiit inummut allanngorarpur, tassaagajullutilli anniarneq, iluaalliorneq, imermik imerpallaarsimannginneq nerrikippallaarsimanerluunniit. Kiisalu puigortunngortoq nammineersinnaajunnaarsinneqartutut misigisimalluni.

Puigortunngortoq avaangusunnersoq (sammisaqartinneqarpiannnginnersoq) imaluunniit annertuallaanik misigisaqarnersoq (sammisaqartinneqarpallarnersoq) aamma eqqumaffigisariaqarpoq.

Pingaaruteqarpoq nappaataa pinnagu inuttaa naapinnissaa. Tamanna isumaqarpoq, qanigisatut paaqqutarinnillutillu sulisutut illit naapinnartariaqarpatit taamaaliornikkullu eqqissisarlugit.

Makitsaarinnngorneq eqqissiveerunnerluunniit ullormut piffissami aalajangersimasumi imaluunniit arlaannik aalajangersimasumik pisoqarnerani takkuttarnermut maluginiaruk. Inuttaa paasilluarsinnaanngisaminut imaluunniit innarligaasutut misigigaangami qisuariartarpa? Inuttaa ataqqineqarpa naleqartinneqarlunilu? Inuttaa naammattumik angalanissamat periarfissaqarpa? Puigortunngortup aneeqatiginera inuttaanut eqqissisaataasinnaavoq. Inuttaanut isumalittut misigineqartumik sammisaqarnerissamat periarfissaqarpa? Inuttaata siornatigut soqutigisarisimasaanik, sunngiffimmi sammisarsimasaanik imaluunniit inuussutissarsiutigisimasaanik aallaaveqarluni sammisassanik pisariitsunik, peqataaffigissallugit nuannarisaanik, nassaarnisqaq periarfissaagajuppoq.

Tassanngaannaq makitsaarnerup annernermit imaluunniit timikkut nappaammik pissuteqarsinnaaneramik pasitsaassinnermi, nakorsamik oqaloqatigininnissaq pingaaruteqarpoq.

